




ANTARA bungkusan mengandungi 55 juta pil methamphetamine yang dirampas pada Oktober 2021. – AGENSI



POLIS Laos merampas 36 juta pil dan 590 kilogram kristal methamphetamine di bandar Huay Xai. – WIKIMEDIA

Polis Laos rampas 36 juta pil, 590 kilogram kristal methamphetamine

Rampasan dadah kedua terbesar di Asia

HUAY XAI, LAOS – Polis Laos dilaporkan merampas sejumlah 36 juta pil methamphetamine sekali gus rampasan dadah kedua terbesar di Asia setakat ini, lapor laman berita *The Thaiger* kelmarin.

Rampasan dadah terbesar dibuat pada Oktober tahun lalu.

Seorang pegawai Pertubuhan Bangsa-Bangsa Bersatu (PBB) mengesahkan perkara tersebut awal kelmarin dengan menyatakan, rampasan itu menunjukkan berlaku perubahan dalam corak penyeludupan dadah di Asia Tenggara.

Dalam rampasan pada minggu lalu, 36 juta pil dadah itu ditemui

bersama 590 kilogram kristal methamphetamine di bandar Huay Xai. Polis turut merampas sepecuk senapang patah dan heroin yang jumlahnya tidak didedahkan. Serbuan dilakukan malam Rabu lepas.

Pihak berkuasa mengesyaki pil dadah murah itu diseludup untuk dijual di Thailand di mana harga dadah kian merosot disebabkan lambakan bekalan. Bagaimanapun, kristal methamphetamine asli itu dirancang untuk diseludup melalui Thailand dan dihantar ke Australia yang boleh dijual pada harga lebih tinggi.

Wakil Pejabat Hal Ehwal Da-

dah dan Jenayah PBB serantau, Jeremy Douglas berkata, empat orang ditangkap berhubung rampasan dadah tersebut.

"Empat suspek yang diberkas adalah anggota sindiket berpangkat rendah. Mereka bukan raja dadah.

"Ini merupakan rampasan kedua terbesar pernah dibuat oleh Laos. Thailand tidak pernah melakukan rampasan sebesar ini," kata Douglas.

Kawasan Segi Tiga Emas di Asia Tenggara meliputi sempadan Thailand, Myanmar dan Laos telah lama menjadi tempat bagi aktiviti penyeludupan dan penghasilan dadah serta aktiviti

haram lain.

Namun sejak beberapa tahun dan bulan kebelakangan ini, jumlah barangan seludup yang melalui rantau itu semakin meningkat.

Akibat pandemik Covid-19 yang berterusan, pihak-pihak berkuasa telah memperketat kawalan sempadan, menyebabkan laluan asal untuk kegiatan penyeludupan telah berubah. Berikutan tumbangannya kerajaan Myanmar yang dipilih secara demokrasi dalam rampasan kuasa tentera hampir setahun lalu, negara itu dilanda ketidaktentuan sivil dan geopolitik.

Krisis kemanusiaan akibat ku-

deta itu bukan saja membuka peluang kepada peningkatan penyeludupan dadah, malah turut memindahkan laluan asal penyeludupan di sempadan Thai-Myanmar di mana kawalan keselamatan berada pada tahap paling tinggi ke laluan baharu melibatkan sempadan Myanmar-Laos.

Pada Oktober tahun lalu, polis Laos di rantau Segi Tiga Emas telah merampas 55 juta pil dadah methamphetamine serta methamphetamine kristal seberat 1,360.78 kilogram dalam rampasan dadah yang dianggap oleh PBB terbesar di Asia pernah direkodkan. – AGENSI/AFP